

# HRÜTHOACHAREI KO

## Sokothu Ko

**1** Acharei sü Oramei no rachi ea  
oji sopie. <sup>2</sup>Oji sü okhre ozhe hoe  
ea masa süe, ea kozü süno ozhe katei  
pile sü bue, ea Oramei raku süno odzü  
pheno ahepfo leie. <sup>3</sup>Ea Oramei no pe,

“Kava sü pralo, ea kava sü praloe.  
<sup>4</sup>Ea Oramei no kava sü zhiwo neloe;  
ea Orammei no kava sü kozü leno  
sokrileiotie. <sup>5</sup>Oramei no kava süno  
chihra tto koloe, ea kozü süno pfo no  
chikhri tto koloe. Ea chithu ea chikro  
sü buloe, ea süsüno chithu kareini süe.

1:3 2 Kor 4:6

6 Ea Oramei no pe, "Odzü leno chimadei pralo, ea losü peno odzü leno odzü sü somakrileio." <sup>7</sup>Ea Oramei no chimadei sü soloe ea chimadei pile kibu ea chimadei khrule kibu odzü sü sokrileiotie. Ea sübvülotie. <sup>8</sup>Ea Oramei no chimadei süno rachi tto koloe. Ea chikro ea chithu sü buloe ea süsü chithu kahei ni süe.

9 Ea Oramei no pe, Rachi khrule kibu odzü thopfü sü obu kale kono adulo, ea oji kaki sü mapralo. Ea sübvülotie. <sup>10</sup>Oramei no oji kaki süno chajiphe tto saloe, ea odzü adukowo süno ozhe katei tto pfo no saloe. Ea Oramei no hihi zhiwo neloe. <sup>11</sup>Ea Oramei no pe, "Chajiphe sü peno ovupro, otho kate sübu, ea rashibu khru sü alia thomate thephrüwo peno chajiphe sü mapepralo." Ea sübvüo pralotie. <sup>12</sup>Chajiphe sü ovupro, alia thomate thephrüwo sübu, alia thomate thephrüwo rashibu khru sü pepralotie. Ea Oramei no hihi zhiwo nelotie. <sup>13</sup>Chikro ea chithu sü buloe ea süsü chithu kosü kochuni süe.

14 Ea Oramei no pe, "Chikhri ea chihra somakripralo koru duno chimadeiva rache hi kava sü mapralo, ea sükhru sü peno chaka chohro, chithu chilu ea mopfu sü mosülo koru amashi mosolo, <sup>15</sup>ea sükhru sü peno chimadeiva rachi kava sü mosowo chajiphe sü mava pio." Ea sübvülotie. <sup>16</sup>Ea Oramei no kava kaji kahei solotie, kava jikopuna süno chihrale duno ea kava kakheina süno chikhrile duno; ea pfo no chevu khru se sopie. <sup>17</sup>Ea Oramei no ojiphe mavapi koru duno sükhru sü chimadeiva rachehi kheipie. <sup>18</sup>Sütoko chikhri chihra mavapi koru duno, ea kava sü kozü leno sokripi koru dunoe. Ea Oramei no süsü zhiwo nelotie. <sup>19</sup>Chikro ea chithu sü buloe ea süsü chithu padeini süe.

20 Ea Oramei no pe, "Ea odzüle sü kahrina tali maphralo, ea ruhu khru peno chimadeiva rachi no chijiphe zhemotuwo maleio." <sup>21</sup>Süduno

Oramei no ozhe kateile khena kajili, ea ota krikriwo kahrina tali sopie, ea koshö kopfü ruhu tali sopie. Ea Oramei no hihi zhiwo nelotie. <sup>22</sup>Ea Oramei no sükhru sü shihra pie, "Ozhe kateile sü peno pra phrolo, ea ruhu khru peno ojiphe sü mopropralo." <sup>23</sup>Chikro ea chithu sü buloe ea süsü chithu pongoni süe. <sup>24</sup>Ea Oramei no pe, "Chajiphe hi kahrina alia tta thephrüwo maphralo: Otumorü, opfu no nearo kata ea ojiphe khena alia tta thephrüwo maphralo." Ea sübvüo pralotie. <sup>25</sup>Ea Oramei no alia tta thephrüwo chajiphe khena, tumorü, ea chajiphe no opfu no nearo kata khena khru sü sopie. Ea Oramei no hihi zhiwo neloe.

26 Süthesü Oramei no pe, "I no ikhre-nга leno i yi bvüo omei yi sopi leshe; ea pfole yi peno ozhe kateile okho, cheva ruhu, tumorü, chajiphe opfu no nearopfo kata khena, ea chajiphe thopfü pile mochowo mohruo." <sup>27</sup>Süduno Oramei no pfo khre-nга leno, Oramei khre-nга leno omei yi sopie, pfoto ea nito pfo no sopie. <sup>28</sup>Ea Oramei no pfohei yi shihra piwo pe, "Otona hrüzhwo proshupralo, ea chajiphe hrüphro matepralo ea kokhawo mohruo, ea ozhe katei kajile kho, cheva ruhu khru, ea chajiphe no kohru khena thopfü pile mokhuwo hrüo." <sup>29</sup>Ea Oramei no pe, "Koleio, ai no chajiphe thopfüle othomate kopfü ovupro thopfü, ea rashitho amashi sübu thopfü hi ni koto koshö sole. <sup>30</sup>Ea chajiphe khena thopfü, cheva ruhu, ea ojiphe opfu no nearo kata khena, osü kohiwo kibu kahrina thopfü koto koshö so koru duno ai no piwotie." Ea hihi sübvülotie. <sup>31</sup>Ea Oramei no pfo alia sokowo thopfü sü nelotie, ea koleio hihi zhishutie. Ea chokro ea chithu sü buloe ea süsü chithu choroni süe.

**2** Subvüo rache ea chajiphe ea lole kibu thopfü sü somochulotie. <sup>2</sup>Ea chithu chanini sü Oramei no pfo

no ovo sü somochulotie, ea pfo no chithu chanini sü pfo no koso ovole süno asoe.<sup>3</sup>Oramei no chithu chanina sü shihrapie ea somothupie, adeiteli hinihi Oramei no sokocho pfo vo thopfü leno asoloe.<sup>4</sup>Rache ea chajiphe sokapi acharei ko sü hikhrus hie. LIPEO Oramei no rache ea chajiphe sokapi chisü,

### Eden Topri

5 Chajiphe sü sübu ea ovupro peprawo tsüpra moe, adeiteli LIPEO Oramei no chajiphe sü ochi morüngho pilo monghie, ea oji dewo ota takapimei honghie; <sup>6</sup>ana chajiphe no kahekru kali ajikhru, ea ojipra thopfü sü odzü no kozüpие. <sup>7</sup>Ea LIPEO Oramei no oji vano one pfollowo omei yi sopie, ea pfo ngħo chilulehi kahri osü sü kohi thopie; ea omei sü kahrina kali pralotie.

8 LIPEO Oramei no chinghei kaprapo Eden lehi topri kali soloe, ea lole sü hi pfo no sokapi omei sü pfo no kheipie. <sup>9</sup>Ea chajiphe süno LIPEO Oramei no osübu tali sü mapeprapie. Sükhrus sü kolei pfotho mamei zhie ea koto kosho duno zhie. Kahri sübu ea kazhi kashi süamakri sübu se topri totsü majile bue.

10 Kori kali Eden le süno topri sü odzü kozü pilo koru duno mokrū kro pie, ea süthesü lohe süno kori padeiso krümara tatie. <sup>11</sup>Kareina zhu sü Pishon tie, hina hino shana kapra Havilah ji fühe thopfüle krühewe. <sup>12</sup>Hile no kapra shana hi zhie; okrei kazhi omu kachi sü ea omu kachi onaix tu-e newe. <sup>13</sup>Kori kaheina zhu süno Gihon tie; hinahi no Kush ji fühe thoüpfüle krühewe. <sup>14</sup>Kori kosüna zhu sü Taigris tie, hina hino Assaria chiprapo krütawie. Ea kori padei na sü Euphratis tie.

15 LIPEO Oramei no omei yi peno Eden topri leno ota mata ea mokhu koru duno kheipie. <sup>16</sup>LIPEO Oramei no

omei yi sü molewo pe, "Ni modoso toprike rashī kata-e toa zhie.<sup>17</sup>Ana kazhi kashi süamakri rashī sü ni no tole moe, adeiteli ni no hihi to kolo chithuni sü ni thitile."

18 Süthesü LIPEO Oramei no pe, "Pfoto-o hi alia korb zhi moe; ai no pfo yi duno okhalo koru sokokhro kali sopile."<sup>19</sup>Süduno LIPEO Oramei no ojine mano ojikhe ea chiva ruhu thopfü sü sopie, ea sükhrus sü pphoto-o he sü pfo no adei zhu sapi lesa tto kolei koru duno pfovupie; ea pphoto-o no kahrina katako ozhu sapi kochu süno lokhrus zhu sü saloe.<sup>20</sup>Pfoto-o no otumorü thopfü, chiva ruhu khrus, ea jiphe khena thopfü zhu sü sapie; ana pphoto-o duno sokokhro okha kaliko nemotie.

21 Süduno LIPEO Oramei no pphoto-o sü somazhetitiotie, ea pfo no ozhe koto chino pfo vano kotrepo kali süzha praloe ea lobule sü oso no tho maka piwtie;<sup>22</sup>ea LIPEO Oramei no pphoto-o vano pfo kaphra kotrepo süno pfo no nitomei kali sopie ea lopej sü pphoto-o he pfovupie.<sup>23</sup>Süthesü pphoto-o no pe,

"Okheisowo hihi are leno  
pfokaphra are koe  
ea aso leno pfokaphra aso koe;  
lopej yi hino nitomei tto kole,  
adeiteli hipei hi pfotomei vano  
pfophraloe."

24 Süduno pfotomei kali no pfo pfo ea pfo pfü yi theotiwo pfo chemei yi sü kohrutiwe, ea pfohei sü oso kali sotiwe.

25 Pfoto-o ea pfo che pfohei sü masakhreis leisüe, ana ahre moe.

### Omei no Ochüzümo Koto

**3** Ichowo khengho no LIPEO Oramei no sokapi rusu hrule kakri dzüno chakeipie. Pfo no nitopei he pe, "Nihei no toprike rashī katako kochuma tolemeo tto Oramei no pewowo?"

2 Nitopei no khenghohe pe, "I no toprike rashī katako to-e zhie;<sup>3</sup>ana Oramei no pe, 'Nile no topri totsü

majile kibu rashibu nava rashih i tole  
moe, mo-e nile no hihi dei-e deile moe,  
süvüli nile thitile.”

4 Ana khengho no nitopei he pe,  
“Nile no thi lemoe.<sup>5</sup> Adeiteli Oramei  
no süwe süoli nile no hihi tokolo thesü  
nile nghei hrupra tile, ea nile no  
Oramei bvütile, kazhi kashi  
sümakrilo tile.”

6 Süduno nitopei no rashibu sü  
tozhishule tto nelotie, ea losü kolei  
pfoto zhishutie, ea omei yi sochakei  
pilo koru duno rashih sü monüshu lowo  
lopei no rashitho sü hrato lotie; ea  
lopei no kopoko lopei chow yi se pie,  
ea pfo se tolotie.<sup>7</sup> Süthesü pfohei nghei  
sü hrupralotie, ea pfohei sü masa  
leisüe ticho pfohei no sülötie; ea pfohei  
no chidongho no torükapa lowo pfohei  
dzükohu solotie.

8 Ea LIPEO Oramei no amake  
phachi no topri leno taleikowo khu sü  
cholotie, pfoto-o ea pfo che sü LIPEO  
Oramei nghodzüno toprike sübu khru  
hruleno kotsütie.<sup>9</sup> Ana LIPEO Oramei  
no pphoto-o sü kowo pfohe pe, “Ni  
adeichi bue?”

10 Ea pfo no pe, “Ai topri leno ni khu  
choe, ea ai no prtie, adeiteli ai  
masakhrei butie; ea ai alia kotsütie.”

11 Pfo no pe, “Ni masakhrei butie  
ticho athe no ni he pe? Ni yino tosho  
tto kape rashih bunava tino ni rashih  
toloti momo?”

12 Pphoto-o no pe, “A yi mapa koru  
duno ni no kapi nitopei tino rashibu  
vano rashih a yi piwo ai tolotie.”

13 Süthesü LIPEO Oramei no  
nitopei he pe, “Ni no sokowo hi  
adeitiwe?” Nitopei no pe, “Okhengho  
no a yi kolawtie, ea ai no tolotie.”

### **Oramei no Icha Kapi**

14 Süthesü LIPEO Oramei no  
khengho he pe, “Ni no hihi sokowo  
duno, otumorü thopfö dzüno, ea oruso  
kakri thopfö dzüno ni kashi kakha sü  
so. Ni hrü mameile ni pfu no niaropfo  
tale, ea ni no ojine towo hrüle.<sup>15</sup> Ai no

ni ea nitopei kole, ea ni shulu ea lopei  
shu-lu kole amahrei sü thopile; pfo no  
ni pivahi izhu pile, ea ni no pfo phiku  
sü made pile.”

16 Nitopeihe pfo no pe, “Ai no ni  
napfü nopfo kochochi ni amazhe sü  
pipule; ni chikhe sowo moto monole,  
süvümate-e ni no ni chow yi sü  
monüle, ea pfo no ni pile kokhale.”

17 Ea Adam he pfo no pe, “Ni no ni  
chemei chü züwo ai no ni yino tosho  
tto kape ‘Ni no hihi tole moe’ ticho  
rashih sü to kolo duno ojine hi ni duno  
kazhi sochino; ni kohru mameisa  
choho sowo hihi totile.<sup>18</sup> Osüshu sü ni  
yi duno motsüprapi tile; ea ni no odole  
vupro sü totile.<sup>19</sup> Ni prava no  
kokhrüdzü prawo ni ojine le adaloti  
komosa ni koto kosho nitole, adeiteli  
ni yi hile hino pfophrae. Ni yi sü ojine  
no sopie, ea ni sü ojinele adalo krile.”

20 Adam no pfo chemei zhu sü Ef  
tto saloe; adeiteli lopei süno jiphemei  
thopfö pfü sütie.<sup>21</sup> Ea LIPEO Oramei  
no Adam ea pfo che yi duno osohei no  
osa solowo pfo hei yi bapie.

### **Adam ea Ef yi Topri leno Matakowo**

22 Süthesü LIPEO Oramei no pe,  
“Koleihio, omei hi itamei yi bvü tie ea  
kazhi kashi sümakrilotie. Pfo yi peno  
kahri sübu vanorashitho sü moto lowo  
chisa mahri lemoe.”<sup>23</sup> Süduno LIPEO  
Oramei no pfo yi sokapi ojine sü peno  
madeto koru duno Eden topri leno  
matawtie.<sup>24</sup> Pfo no omei yi sü  
humatawtie; ea Eden topri no  
chinghei kaprapo sühi pfo no kosho  
kopfö cherubim khena yi, ea lopei  
hipei keingho thopfile mikri no  
phrupra kowo khrochu kali kheihi  
towo kahri sübu sü mokhulotie.

**THE HOLY BIBLE**  
*Mao - C.L.*  
10H 0031/94-95/3M STD  
ISBN 81-221-4223-0

**COPYRIGHT NOTICE**

*Written permission must be obtained from the Bible Society of India as copyright holder, prior to the reproduction of any part of this publication in any form or by any means, electronic or mechanical, including photocopying, recording, or any information storage and retrieval system.*

*Published by:*  
**The Bible Society of India**  
**206 Mahatma Gandhi Road**  
**Bangalore – 560 001**

Printed in India by Photo offset process at  
Swapna Printing works pvt. Ltd, Calcutta-9